

蔺相如完璧归赵论

王世贞

蔺相如之完璧、人皆称之、予未敢以为信也。

赵惠文王时、得楚和氏璧、秦昭王欲以十五城易之、赵王使蔺相如奉璧西入秦。相如视秦王无意

偿赵城、使其从者怀璧从径道亡、完璧归赵。○劈手一断。

夫秦以十五城之空名、诈赵而胁其璧。是时言取璧者情

也、非欲以窥赵也。

情、谓诈赵之情也。秦非欲谋赵、其情止欲取赵之璧。

赵得其情则弗予、不得其情则予、

得其情而畏之则予、得其情而弗畏之则弗予。此两言决耳、奈之何既

畏而复挑其怒也。

予璧、畏也。复怀以归、挑其怒也。○此段言止有予与弗予两说、不当既予而复怀归。

且夫秦欲璧、赵弗予璧、两无

所曲直也。入璧而秦弗予城、曲在秦。秦出城而璧归、曲在赵。欲使

曲在秦、则莫如弃璧、畏弃璧、则莫如弗予。

相如谓赵王曰、秦以城求璧、而赵不许、曲在赵。赵予璧、而秦不予赵城、曲在秦。此言赵弗予璧、亦无所

曲。以辨其赵不许曲在赵之说。

夫秦王既按图以予城、又设九宾、斋而受璧、其势不得不予城。

秦王从相如之言、斋戒五日、设九宾礼于庭、引相如受璧、势不得不予赵城也。○作一颺。

璧入而城弗予、相如则前请曰、臣固知大王之

弗予城也。夫璧非赵璧乎、而十五城秦宝也、今使大王以璧故、而亡

其十五城、十五城之子弟、皆厚怨大王以弃我如草芥也。既不可以城易璧。大王弗

予城、而给台上声赵璧、以一璧故、而失信于天下、臣请就死于国、以明

大王之失信。又不可以璧易信。秦王未必不返璧也。此段代为相如画策、璧可以还赵、而直亦不在秦。今奈何使舍人怀而

逃之、而归直于秦。是时秦意未欲与赵绝耳、令秦王怒、而僇相如于

市、武安君秦将白起。十万众压邯邯鄲、赵都。、而责璧与信、一胜而相如族、再

胜而璧终入秦矣。吾故曰、蔺相如之获全于璧也、天也。言相如归璧、而获全无受害者、乃一时之幸、非人力也。

若其劲渑池、赵王与秦王会渑池、秦王请赵王鼓瑟、相如亦请秦王击筑、是劲渑池也。柔廉颇、相如一旦位在廉颇之右、廉颇羞为之下、欲辱相如、相如尝畏避之。廉颇负荆请罪、卒相与欢、是

柔廉颇也。则愈出而愈妙于用。所以能完赵者、天固曲全之哉。余波作结。

相如完璧归赵一节、至今凛凛有生气、固无待后人之訾议也。然怀璧归赵之后、相如得以无恙、赵国得以免祸者、直一时之侥幸耳。故中间特设出一段中正之论、以为千古臣保国保身万全之策、勿得视为迂谈、而忽之也。